

Slyst ny Marrey

Kione ny Garee, Gob ny Strona,
Gob yn ushtey as Stack Mooar-
Shoh ny king ayns Mannin veen
Ta shassoo magh noi niart y vooir.

Agh Gob Ruy bog as Shellag gheinnee-
Grine er grine ta geidit voue,
Skeabit ec ny tonnyn mooarey-
Eayninyn ta skellal roue.

Ta thaloo tuittym, thaloo caillt.
Ta gaalyn marrey jannoo cragh,
Agh goll my-hwoaie er y troo,
Ta Kione ny hAyrey sheeyney magh.

Gob ny Rona, Kione ny Spaainey,
Kione Dhoo, Gob Lhiack as Stroin Vuigh-
Lhig da tonnyn, gatt as freayney,
Rolley stiagh lesh ferg as bree,

Ta ny creggan scarrey ad,
As croo kesh vane ayns coirrey keoie.
Myr shoh, ta'n faarkey ceaut er-ash
As brisht ec king ta shassoo noi.

Agh foast ayns Baie ny Carrickey
Ta'n ushtey brishey stiagh lesh pooar.
T'eh soilshit magh dooin ec y cheayn
Nagh vodmayd cur shaghey tidey vooar.

Nagh mooar yn niart t'ec y cheayn
Ta'n slyst aa-chummit lesh e phooar.
Ny yei ta creggan shassoo noi,
Ta'n faarkey jannoo jeeill dy liooar,

As lesh e lajerys as niart,
Ta'n thalloo shoh caghlaait dagh laa.
Ayns ellan beg, t'ayns mean y cheayn,
S'mooar ta'n faarkey ayns nyn mea.

Bob Carswell